

## **ҒУРУР ВА ИФТИХОР РАМЗИ**

**Мустақиллик йилларида мамлакатимизда кенг кўламли бунёдкорлик ишлари амалга оширилиб, юртимизнинг куч-қудрати ва салоҳияти ҳар жиҳатдан юксалиб бормоқда.**

Ҳадемай, Истиқолимизнинг 30 йилини кенг тантана қиласиз. Бу давр ичидаги диёrimизда асрларга татигулик ишлар қилинди. Республика изда демократик ҳуқуқий ислоҳотларни янада ривожлантириш, фуқаролик жамиятини барпо этиш ҳар бир юртдошимиздан мамлакат тақдирига дахлдорлик ҳисси билан яшашни талаб этади.

Мустақиллик — халқимизга озод ва фаровон ҳаёт, тинч-осуда турмуш, янги имкониятлар ва буюк келажак инъом этди. Эътиборлиси, халқимизнинг азалий орзу-истаклари, эзгу интилишлари Ўзбекистон Республикасининг давлат рамзларида ўзининг ёрқин ифодасини топди.

Ўзбекистон Республикасининг муқаддас давлат рамзлари — Байроқ, Герб, Мадҳия халқимизнинг шон-шавкати, маънавий-маданий мероси, миллий анъана ва қадриятлари, ор-номуси, ғурури, тарихий хотираси ва орзу-интилишларини ўзида мужассам этган.

Бундан роппа-роса 29 йил муқаддам - 1992 йил 2 июлда “Ўзбекистон Республикасининг Давлат герби тўғрисида”ги Қонун қабул қилинган эди. Мазкур Қонунда Давлат герби мустақиллигимиз рамзларидан бири экани ҳуқуқий асосда мустаҳкамлаб қўйилиши билан бирга, унинг қандай кўринишга эгалиги яққол ифодалаб берилди. Шу санадан эътиборан, Давлат герби тасвири мамлакатимиздаги барча давлат ва жамоат ташкилотлари биноларига ўрнатилди. Шунингдек, олий рамзимиз тасвири муҳрларда ва давлат идоралари сарварақларида, расмий нашрларда, қоғоз ва танга пулларда, қимматли қоғозлар ва фуқаролар паспортида ҳамда қонунда белгиланган бошқа ўринларда акс эттирилди.

Мамлакатимизда давлат рамзлари, шу жумладан, Давлат герби ҳам қонун билан муҳофаза қилинади. “Ўзбекистон Республикасининг Давлат герби тўғрисида”ги Қонунда белгиланганидек, Ўзбекистон фуқаролари, шунингдек, Ўзбекистонда яшаб турган бошқа шахслар Ўзбекистон Республикасининг Давлат гербини хурмат қилишлари шарт.

Ўтган йилларда барча давлатимиз рамзлари қатори гербимиз ҳам ҳаётимиздан чуқур ўрин эгаллаб, юртдошларимиз учун ифтихор тимсолларидан бирига айланди. Зоро, Ватанимиз герби унинг ўзи каби азиз ва муқаддасдир.

**Аброр ДЕҲҚОНОВ,**

**Риштон тумани ҳокимлиги Ахборот хизмати раҳбари**

2021-07-02 06:54:14